

Erich Bolinius

Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 8.3.2012 18.05 Uhr** auf 94.0 bzw. 87,7)

Moin, leev Toehörers,
as ik lesd Sönndag mit mien Jung un mit mien Enkelin **Sharina** fahren bün, hebb ik doch, dat man 'n paar Toekiekers komen würrn. Mien Jung **Rolf** was dor al anner Menen. Un he tippte dat Spöl 8:1 för Kickers. Wenn he dor man neet mit skeev liggt, hebb ik doch.
As ik de Kickers-VIP-Ruum, so as immer wenn Kickers 'n Heimspöl hett, betreden hebb, satten blot de Schiris mit **Willi Körner** van Kickers bi 'n Koppke Tee. Bit 'n Vördelstünn vör Klock dree stunn ik alleen an 'n Stahtafel, bevör noch well kwamm. Na ja, mögen dann doch noch wall so 10 Lü komen wesen.

Man wat ik neet docht harr, was, dat sovöl Toekiekers sük dat Spöl Kickers Emden tegen Eintracht Nordhorn in de Oostfreesland-Stadion ankeken würrn. 225 Lü hebben Intree betahlt, tellt man aber de Toekiekers dorbi, de keen Intree betahlen mutten, bispillswies de Jögdspölers mit hörs Trainer un Betreuers, dann sölen wall rund 300 Lü in 't Stadion west wesen. Mi was so, as wenn ik bi 'n heel normaal Oberligaspöl dorbi was. Man dat was je neet so, dat gung in disse Spöl um nix. Sücht man van de Ehr maal of. Un dat de Spölers dat ernst nammen, dat kunn man van de eerst Menüte of an marken. Trainer **Uwe Groothuis**, de Enn van disse Saison uphört – ja uphören mutt –, Teammanager **Karsten Golnik** hebben na mien Menen 'n moi Mannskupp toesaenstellt.

Von Anfang an harr Kickers Nordhorn goed in Greep. Man dat dürs noch 30 Menütern bevör **Christopher Appeldorn** dat eerst Tor för Kickers skoot. **Bernd Grotluschen** harr de Ball moi mit Kopp verlängert. Bernd Grotluschen, he was tegen **Manuel Menzel** för mi de best Spöler up de Platz, was bit up een Tor an all 7 Toren bedeelegt. Dat tweed Tor skoot he sülvst un ok dat sövente. Heel kört vör de Paus verkörte **Oliver Temelkow** up 1:2, he overraschte Torwart Renè Carstens mit 'n Wietskoet.

Na de Pausentee sörgten Appeldorn un **Karl-Heinz Böhmer** mit moi rutspölte Toren toe dat 3:1 in de 54. und 4:1 in de 64. Menüte dorför, well in d' Stadion dat Seggen harr. Manuel Menzel tunnelte Nordhorns Torwart **Christian Amshoff**, so dat dat fiefte Tor för Kickers Emden full. An Enn van dat Spöl haalte he noch 'n Elfer rut, de **Tizian Goudschaal** toe dat 6:1 verwannelte.

De Spölers un de Kickersfans fierten disse Sieg so, as wenn se nett Meister worden wassen. Ik funn dat moi, seggt dat doch för mi ut, dat Kickers Emden neet stürven is, sünnern lebt.

Nu hoop neet blot ik, dat Kickers Emden mit disse jung Mannskupp noch 'n paar Spölen in disse Saison maken kann. De Spölers un Trainers hebben dat verdeent.

So, nu toe Schluss, so as alltied, noch 'n Foetballwitz:

De Frau van Mario Basler in de Hochtiedsnacht: „Ik mutt di wat gestahn, ik hebb Astma.“

Mario: „Een Glück, ik doch al, du fleitst mi ut!“

So, leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt netso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.